



3. Tschanteda da la suprastanza cumünela in marculli, ils 24.2.2016 a las 19.00 in chesa cumünela S-chanf

Presidi: Duri Campell

Preschaints: Gian Andrea Bott (a partir da tractanda 17), Paolo Bernasconi (a partir da tractanda 17), Jnes Barblan, Liun Quadri

Absaints: Gian Andrea Bott (fin tractanda 16) Paolo Bernasconi (fin tractanda 16)

Actuar: Duri Schwenninger

Tractandas:

- | | | |
|-----|-------|--|
| 1. | | Protocol |
| 2. | 0.211 | Dumandas da fabrica |
| 3. | 1.090 | Zonas da pos, surpassamaint art. 28 ledscha da fabrica |
| 4. | 7.900 | Consultaziun regulaziun nouva asils per sulvaschina |
| 5. | 1.600 | Spustamaint da la sirena Chapella, decisiun per ün nouv lö |
| 6. | 3.000 | Turnea Lillith, dumanda per pudair mner tres producziun a S-chanf e dumanda per ün sustegn finanziel, fr. 1'650.00 |
| 7. | 0.211 | Directiva da valütaziun, concepziun e structura d'implaunts solars, 2. lectüra |
| 8. | 0.130 | Collavuraziun forestel ed infrastructuras S-chanf – Zuoz, lectüra quint finel 2015 |
| 9. | 0.209 | Angelini SA, dumanda per prolungiaziun contrat da fittaunza per töch terrain sün l'areal da la deponia Bos-chetta Plauna scu deposit da materiel |
| 10. | 9.999 | Varia |

La glista da tractandas vain approveda sainza objecziuns.

Protocol: Il protocol da la tschanteda dals 02.02.2016 vain approvo unanimamaing.

13 0.210 Annunzchas da fabrica

Swisscom (Schweiz) AG	130	trer aint ün nouv cabel da fibra illa vasca existenta
-----------------------	-----	---

14 0.211 Dumanda da fabrica
Angelini Beate e Peter, deliberer dumanda da fabrica dals 2 meg
2011 da la zona da planisaziun

La suprastanza vaiva decis da l'an 2011 da suottametter la dumanda da fabrica da Beate e Peter Angelini a la zona da planisaziun per müdamaints interns sün parcella nr. 16 in Somvih. Que d'eira indispensabel, siand cha la dumanda correspundaiva cun la ledscha veglia ma cuntradiva la nouva ledscha da fabrica. Pü tard s'ho stuvieu resguarder las directivas regard l'iniziativa da seguondas abitaziuns. Uossa es entreda üna charta da Beate e Peter Angelini cun la dumanda per pudair licenzcher la dumanda da fabrica da l'an 2011 our da la zona da planisaziun e d'introdür la procedura da fabrica ordinaria, siand cha la leghelited da las ledschas superiuras es uossa avaunt maun. Zieva cuorta discussiun decida la suprastanza unanimamaing da deliberer la dumanda suottamissa da l'an 2011 a la zona da planisaziun cun las cundiziuns, cha quella ho da gnir adatteda a la ledscha da fabrica ed a la ledscha federela per seguondas abitaziuns. aunz cu publicher l'intent da fabrica.

15 1.090 Giuridicziun
Zonas da pos, surpassamaint art. 28 ledscha da fabrica

La suprastanza vain orienteda davart 2 surpassamaints da la ledscha da fabrica, artichel 28, zonas da pos, dals 16.01.2016 in Arschaids, Zieva avoir do la pussibilitad als culpabels da piglier pusiziun (dret da gnir udieu), decida la suprastanza unanimamaing da multer ils surpassamaints cun fr. 200.00 per persuna. Impü dessan gnir chargios ils cuosts supplementers als culpabels.

16 7.900 Planisaziun dal territori cumünel
Consultaziun nouva regulaziun asils per sulvaschina

Ils territoris per la protecziun da la sulvaschina vegnan fixos da la Regenza in regla per 5 ans tenor ledscha da chatscha. Las vschinaunchas pertuchedas haun la pussibilitad da piglier pusiziun in merit. L'ultima revisiun dals territoris per la protecziun da la sulvaschina es gnida mneda tres da l'an 2010. La suprastanza piglia cugnuschentscha da las actas missas a disposiziun da l'uffizi chantunel da chatscha e pes-cha scu eir da la pusiziun da la societad Droschlöng in chosa. Siand cha las actas sun gnidas elavuredas in collavuraziun traunter la societad e l'uffizi chantunel sun tuot ils pertuchos perinclets cun la nouva regulaziun. Nouv vain tiers scu asil il territori Sass Vilaun sur Susauna per cha la sulvaschina ho la pussibilitad da müder traunter ils asils. Zieva cuorta discussiun decida la suprastanza unanimamaing da piglier pusiziun in sen positiv e da render attent regard la pretaisa da la societad Droschlöng, da schlarger l'asil in Splars direcziun Val Torta cun ün cunfin lam.

17 1.600 Protecziun civila
Spustamaint da la sirena Chapella, decisiun per ün nouv lö

In connex cun la vendita da la parcella nr. 826 cun l'edifizi da la resgia veglia es uossa da spuster la sirena da la protecziun civila chi d'eira munteda sül tet da l'edifizi. Zieva cuorta discussiun decida la suprastanza unanimamaing da munter la sirena sül tet dal talvo da Duri Campell. Il talvo es adüna accessibel per gestiuner la sirena.

18 3.000 Cultura
Turnea Lillith, dumanda per pudair mner tres producziun a
S-chanf e dumanda per ün sustegn finanziel, fr. 1'650.00

La suprastanza piglia cugnuschentscha da la dumanda da la gruppa Stradini da pudair fer üna rapreschantaziun da teater a S-chanf. Ils 6 teatrists vegnan da differentas regions da la Svizra e faun üna turnea tres la Svizra. Els preschaintan ün teater professiunel cun üna construcziun da palc mobila e viagian eir illas regions periferas, inua ch'in speciel iffaunts nun haun la pussibilitad da visiter teaters chi correspuondan a lur eted. Il böt principel da

la gruppia Stradini es, da rapreschanter ün teater in muvimaint per iffaunts a partir da 5 ans, ma eir creschieus vegnan sün lur cuosts. Il teater vess lö ils 4 avuost 2016, giavüscho es tar la piazza in Bügl Suot / via Nouva davaunt il bügl. Impü fo la gruppia da teater Stradini la dumanda per ün sustegn finanziel da fr. 1'650.00. Zieva cuorta discussiun decida la suprastanza unanimamaing da pussibiliter la rapreschantaziun dal teater a S-chanf e da sustgnair quella cun ün import da fr. 1'650.00.

**19 0.211 Procedura da fabrica
Directiva da valütaziun, concepziun e structura d'implaunts
solars, 2. lectüra**

Illa tschanteda dals 13.01.2016 vaiva la suprastanza fat üna prüma lectüra e vaiva decis per differents müdamaints. Impü vaiva la suprastanza decis, da tradür la directiva in lingua rumauntscha e da fer zieva üna 2. lectüra. Uossa es avaunt maun la versiun adatteda e tradüta. La suprastanza fo üna lectüra da quella e decida unanimamaing d'accepter la directiva da valütaziun, concepziun e structura d'implaunts solars chi dess schligerir la lavura a tuot ils pertuchos.

**20 0.130 Collavuraziuns intercumünelas
Collavuraziun forestel ed infrastructuras S-chanf – Zuoz, lectüra
quint finel 2015**

La suprastanza piglia cugnuschentscha dal quint finel 2015 regard la collavuraziun i'ls sectuors forestels ed infrastructuras cun la vschinauncha da Zuoz. Il quint es pü equaliso scu'l prüm an. D'üna vart nun ho la gruppia forestela pü effectu sves tagls da laina per Zuoz, la lavur es gnida surdeda l'an passo ad üna firma externa. Da l'otra vart sun gnies druvos quist an dapü veiculs da Zuoz per fer lavuors a S-chanf. Traunter oter s'ho druvo l'Aebi e'l Liebherr per refer la via in Muotta Pitschna e la scua per cunagir da prümavaira las vias. Zieva chi sun gnidas dedas tuot las spiegaziuns, decida la suprastanza unanimamaing d'accepter il quint finel a maun dal rendaquint 2015.

**21 0.209 Contrats e cunvegns
Angelini SA, dumanda per prolungiaziun contrat da fittaunza per
töch terrain sün l'areal da la deponia Bos-chetta Plauna scu
deposit da materiel**

La firma Angelini SA ho daspö ans a fit ün töch terrain sün l'areal da la deponia Bos-chetta Plauna per depositer ed elavurer materiel. Siand cha'l contrat da fittaunza es scrudo, fo la firma Angelini SA la dumanda per prolunger il contrat per ulteriurs 5 ans. Zieva animeda discussiun decida la suprastanza da stipuler ün nouv contrat cun üna düreda dad 1 an u fin cha la planisaziun locala da la deponia es glivreda. Il fit importa fr. 7'500.00 per tuot an.

22 9.999 Varia

Il president orientescha, cha l'uffizi da construcziun bassa ho comunicho, ch'els haun pudieu schoglier il problem da trafic düraunt la refacziun da la via chantunela tal Plaun dals Senchs, chi nu fo dabsögn da svier il trafic sur la punt dal surpassagi da la Viafier retica e cha tenor ledscha chantunela da vias nun es pussibel da surpigliar la punt.

Inavaunt orientescha'l, cha l'uffizi da god e prievels da la natüra ho prolungieu il contrat da collavuraziun cun la Monte Concept SA pel zardin forestel in Flin fin ils 31.12.2018.

Il depüto preschainta a la suprastanza la dumanda da fabrica pel schlargiamaint da l'infrastructura Susauna e spiega la direcziun da las lingias.

Il president orientescha, chi saja gnieu annunzcho cha püssas personas da Brail alluntaneschan las immundizchas, PET, aluminium, palperi vegl e chartun tals deposits a

Chapella u a Cinuos-chel. Cha l'alluntanamaint d'immundizchas es collio sper ils cuosts da chaschuneder, cun cuosts considerabels per la vschinauncha. Cha'l prossem temp gnaro fat controllas ed in cas staun gnir multos ils surpassamaints da la ledscha d'immundizchas.

Il president orientescha, ch'el ho decis da na pü candider i'l mais november 2016 scu president cumünel per las tschernas pel trienni 2017-2019. Our da motivs da temp nu's lascha cumbiner la carica dal cusglier Naziunel cul president cumünel.

A las 20.50 vain la tschanteda alveda.

In buna fè

L'actuar:
D. Schwenninger